

VENDIM
Nr. 400, datë 16.7.2025

PËR DISA SHTESA DHE NDRYSHIME NË VENDIMIN NR. 1085, DATË 24.12.2020, TË KËSHILLIT TË MINISTRAVE, “PËR PËRCAKTIMIN E RREGULLAVE PËR LIDHJEN E KONTRATAVE PËR BLERJEN E PAJISJEVE/MJETEVE TË PROJEKTUARA POSAÇËRISHT OSE TË PËRSHTATURA PËR QËLLIME USHTARAKE, SI DHE ARMËT, MUNICIONET APO MATERIALET LUFTARAKE PËR QËLLIME OPERACIONALE, PËRFSHIRË TEKNOLOGJINË DHE *SOFTWARE*-T E LIDHURA ME KËTO MALLRA, SI DHE PËR PËRBËRJEN, MËNYRËN E ORGANIZIMIT E TË FUNKSIONIMIT TË KOMISIONIT TË VEÇANTË TË KLASIFIKIMIT TË KËTYRE KONTRATAVE”

Në mbështetje të nenit 100 të Kushtetutës dhe të pikave 1, shkronjat “dh” e “i”, dhe 2, të nenit 5, të ligjit nr. 36/2020, “Për prokurimet në fushën e mbrojtjes dhe të sigurisë”, me propozimin e ministrit të Mbrojtjes, Këshilli i Ministrave

VENDOSI:

I. Në vendimin nr. 1085, datë 24.12.2020, të Këshillit të Ministrave, “Për përcaktimin e rregullave për lidhjen e kontratave për blerjen e pajisjeve/mjeteve të projektuara posaçërisht ose të përshtatura për qëllime ushtarake, si dhe armët, municionet apo materialet luftarake për qëllime operationale, përfshirë teknologjinë dhe *software*-t e lidhura me këto mallra, si dhe për përbërjen, mënyrën e organizimit e të funksionimit të komisionit të veçantë të klasifikimit të këtyre kontratave”, bëhen këto shtesa dhe ndryshime:

1. Në titull, pas fjalës “... përfshirë ...” shtohet “... shërbimet, ...”.
2. Në të gjithë tekstin e vendimit, pas fjalëve “agjenci/a/së/e/ve/të/në e/të NATO-s” dhe “agjencisë së saj” shtohen “ose vend/e partner/e i/të Republikës së Shqipërisë dhe/ose të NATO-s ose agjenci e/të tij/tyre.”.
3. Në shkronjën “a”, të nenit 1, pas fjalës “... përfshirë ...” shtohet “... shërbimet, ...”.
4. Në nenin 2 bëhen këto shtesa dhe ndryshime:
 - a) Në fund të pikës 1 shtohen fjalët “... ose struktura varësie apo shoqëri aksionare shtetërore, që ushtrojnë veprimtarinë në fushën e industrisë ushtarake të autorizuar nga Ministria e Mbrojtjes.”;
 - b) Në shkronjën “c”, të pikës 4, fjalët “... ndërmarrjet ushtarake ...” zëvendësohen me “... dhe ...”;
 - c) Pas pikës 21 shtohet pika 21.1, me këtë përmbajtje:

“21.1. “Dialogu negociues” është procedura, përmes së cilës autoriteti kontraktor kryen dialog me shoqërinë aksionare me kapital shtetëror, mbi mundësinë e realizimit të një kontrate me këtë subjekt.”.
5. Në nenin 6, pas fjalës “... përfshirë ...” shtohet “... shërbimeve, ...”
6. Në shkronjën “c”, të pikës 6, të nenit 8, pas fjalës “... projektit ...” shtohen fjalët “... duke iu përmbajtur dhe përditësuar specifikimet teknike, parashikuar në kërkesën operationale ...”.
7. Në pikën 1, të nenit 10, fjalët “... ministrit të Mbrojtjes ...” zëvendësohen me “... titullarit të autoritetit kontraktor ...”.
8. Në pikën 1, të nenit 11, fjalët “... ministrit të Mbrojtjes ...” zëvendësohen me “... titullarit të autoritetit kontraktor ...”.
9. Pas nenit 16 shtohet neni 16/1, me këtë përmbajtje:

“Neni 16/1

Arsyet/kriteret e shkualifikimit të kandidatëve ose të ofertuesve

1. Autoriteti kontraktor shkualifikon nga procedura e përzgjedhjes së fituesve të kontratave për prokurime, që zhvillohen sipas këtij vendimi, çdo operator ekonomik, kur ka të dhëna se ai është ose ka qenë i dënuar me vendim penal të formës së prerë për ndonjë nga veprat e mëposhtme:

- a) Pjesëmarrje në grup të strukturuar kriminal, organizatë kriminale, bandë e armatosur, organizatë terroriste;
- b) Korrupsion;
- c) Mashtrim;
- ç) Pastrim parash ose financim i terrorizmit;
- d) Vepra me qëllime terroriste, vepra penale të lidhura me veprimtari terroriste, nxitje, ndihmë ose mbështetje për kryerjen e veprave penale me qëllime terroriste;
- dh) Organizim, drejtim ose financim i veprimtarisë së prodhimit e shitjes së narkotikëve dhe i veprimtarisë së trafikimit të narkotikëve;
- e) Falsifikim;
- ë) Keqtrajtim i të miturve, sipas nenit 124/b të Kodit Penal, dhe forma të tjera të trafikimit të qenieve njerëzore.

2. Detyrimi për të shkualifikuar një operator ekonomik zbatohet edhe kur personi i dënuar me një vendim të formës së prerë ose bashkëshorti/bashkëshortja është anëtar i një organi administrativ, drejtues ose mbikëqyrës i tij, aksionar ose ortak i operatorit ekonomik apo ka kompetenca përfaqësuese vendimmarrjeje ose kontrolluese brenda tij.

3. Autoriteti kontraktor shkualifikon nga procedura e përzgjedhjes së fituesve të kontratave për prokurime, që zhvillohen sipas këtij vendimi, çdo operator ekonomik, nëse:

- a) ka falimentuar apo është në likuidim, punët/çështjet e tij po administrohen nga një gjykatë, ka bërë marrëveshje me kreditorë, ka pezulluar aktivitetet e biznesit ose është në një situatë të ngjashme, të ardhur si pasojë e një procedure të ngjashme, sipas legjislacionit në fuqi;
- b) është subjekt i procedimeve për deklarimin e falimentimit, për një urdhër likuidimi apo administrimi të detyrueshëm nga një gjykatë, apo një rregullimi me kreditorë, apo ndonjë procedim të ngjashëm, sipas legjislacionit në fuqi;
- c) nuk ka përmbushur detyrimet e tij në lidhje me pagesën e kontributeve të sigurimeve shoqërore, në përputhje me legjislacionin shqiptar ose me dispozitat e zbatueshme në shtetin e origjinës;
- ç) nuk ka përmbushur detyrimet në lidhje me pagimin e tatimeve, në përputhje me legjislacionin shqiptar ose me dispozitat e zbatueshme në shtetin e origjinës.

4. Autoriteti kontraktor shkualifikon nga procedura e përzgjedhjes së fituesve të kontratave për prokurime, që zhvillohen sipas këtij vendimi, çdo operator ekonomik, nëse ai apo edhe përfaqësuesi i tij ligjor, pronari, aksionarët e tij janë gjetur, mbi bazën e provave apo të informacioneve të vërtetuara, duke përfshirë edhe ato të përfituara nga burimet e mbrojtura me ligj, se përbëjnë rrezik të papranueshëm sigurie.

5. Autoriteti kontraktor mund të përcaktojë, rast pas rasti, kritere të tjera për kualifikimin e kandidatëve ose të ofertuesve, në varësi të natyrës së procedurës së prokurimit.

6. Arsytet e shkualifikimit të kandidatëve ose të ofertuesve listohen në njoftimin e kontratës që publikohet.”.

10. Në pikën 3, të nenit 17, bëhen këto shtesa dhe ndryshime:

- a) Në shkronjën “a”, pas fjalës “... financiare.” shtohen fjalët “... në një vlerë jo më të madhe se 50% e vlerës së përllogaritur të kontratës, që prokurohet dhe që është realizuar gjatë tre vjetëve të fundit.”;
- b) Në shkronjën “b”, pas togfjalëshit “... xhiros vjetore ...” shtohen fjalët “.... , vlera e të cilave nuk mund të tejkalojë 50% të vlerës limit të kontratës që prokurohet, ...”;
- c) Në shkronjën “c”, pas fjalës “... procedurave.” shtohen fjalët “... dhe të argumentuara nga autoriteti kontraktor në një procesverbal të veçantë.”.

11. Pas pikës 3, të nenit 18, shtohet pika 4, me këtë përmbajtje:

“4. Dialogu negociues.”.

12. Pas shkronjës “e”, të pikës 2, të nenit 20, shtohet shkronja “ë”, me këtë përmbajtje:
“ë) Kur ka një vendimarrje të Komitetit të Mbrojtjes dhe Sigurisë mbi një projekt specifik.”.
13. Neni 21 ndryshohet, si më poshtë vijon:

“Neni 21
Procedura “shtet me shtet””

1. Procedura “shtet me shtet” realizohet për:
 - a) furnizimin me pajisje ushtarake ose pajisje të klasifikuara;
 - b) punë dhe shërbime, që lidhen drejtpërdrejt me këto pajisje;
 - c) punë dhe shërbime të posaçme për qëllime ushtarake ose punë dhe shërbime, që, për arsye sigurie, përfshijnë, kërkojnë dhe/ose përmbajnë informacion të klasifikuar.
2. Procedurat “shtet me shtet” mund të realizohen në një nga format e mëposhtme:
 - a) Drejtpërdrejt me një vend anëtar të NATO-s ose me një agjenci të NATO-s;
 - b) Nëpërmjet dhënies së autorizimit një vendi anëtar të NATO-s ose agjencie të NATO-s për të kryer procedurat e prokurimit, nëpërmjet marrëveshjeve teknike ose nëpërmjet një kërkesë të veçantë për prokurim;
 - c) Drejtpërdrejt ose nëpërmjet dhënies së autorizimit me një vend partner të NATO-s ose një agjencie të tyre nëpërmjet ose bazuar në një marrëveshje qeveritare;
 - ç) Drejtpërdrejt ose nëpërmjet dhënies së autorizimit me vende partnere të Republikës së Shqipërisë ose një agjencie të tyre, pas miratimit paraprak të Komitetit të Mbrojtjes dhe Sigurisë, nëpërmjet ose bazuar në një marrëveshje qeveritare.
3. Procedura e drejtpërdrejtë me vendin ose agjencinë, sipas përkufizimeve në këtë vendim, është procedura, përmes së cilës autoriteti kontraktor prokuron mallra dhe shërbime nga ose nëpërmjet këtyre institucioneve, me kushtet, çmimet e standardet, që ato zbatojnë për forcat e tyre të armatosura.
4. Procedura me dhënie autorizimi njërit prej institucioneve të cituara në këtë vendim është procedura përmes së cilës autoriteti kontraktor autorizon një nga institucionet në fjalë për të realizuar prokurimin në interes të Forcave të Armatosura, me procedurën, kushtet, çmimet e standardet, që ato zbatojnë për forcat e tyre të armatosura. Në këtë rast, autoriteti kontraktor mund të transferojë paraprakisht fondin financiar të shteti përkatës ose agjencia përkatëse, pas autorizimit të marrë nga ministria përgjegjëse për financat.
5. Procedurat “shtet me shtet” mund të bëhen me kontrata njëvjeçare ose kontrata disavjeçare.
6. Procedura e prokurimit “shtet me shtet” përfshin nënshkrimin e marrëveshjes teknike ose, në mungesë të saj, dërgimin e kërkesës së veçantë vendit/agjencisë përkatëse, të cilave u delegohet realizimi i procedurës së prokurimit, sipas sistemit të tyre të prokurimit. Ky lloj prokurimi mund të realizohet në këto raste:
 - a) Në rastin e ekzistencës së një marrëveshjeje bashkëpunimi ndërmjet shteteve për një fushë/objekt të caktuar, në kuadër të sigurisë dhe mbrojtjes;
 - b) Kur testimi i mallit të caktuar kërkon analizë teknike komplekse dhe Forcat e Armatosura nuk kanë mundësi ta kryejnë atë;
 - c) Në rastet e mospasjes së një ekspertize të mjaftueshme/nevojshme për objektin e prokurimit;
 - ç) Kur një formë tjetër prokurimi e përcaktuar në këtë vendim ka dështuar ose ka argumente të qëndrueshme, që dëshmojnë për mungesë leverdie, për shkak të çmimit ose të cilësisë së dobët së mallit;
 - d) Kur ekzistojnë kontrata të mëparshme të kësaj kategorie, prokurime “shtet me shtet” dhe ajo vlerësohet më e leverdishme sesa blerja e drejtpërdrejtë të një subjekti ekonomik, që operon me këtë shtet ose me shtete të tjera;
 - dh) Kur ka një nevojë urgjente, për shkaqe jashtë kontrollit, apo të parashikimit të autoritetit kontraktor, që kanë të bëjnë me fatkeqësi natyrore ose fatkeqësi të tjera, dhe kur afati kohor limit

për procedura të konkurrimit nuk mund të realizohet dhe ekzistojnë rrethana të besueshme. Rrethanat e krijuara, në asnjë rast, nuk duhet të përdoren për investimet komplekse, të cilat zgjasin më shumë se një vit buxhetor;

e) Në raste urgjencash, kur cenohet niveli i gatishmërisë dhe operacionalitetit të strukturave të Forcave të Armatosura;

ë) Kur nuk mund të gjenden operatorë ekonomikë në treg;

f) Kur shteti/agjencia përkatëse përballon një pjesë të mallit ose shërbimit në vlerë monetare ose në natyrë, por jo më pak se 15% e vlerës totale të mallit ose të shërbimit, që kërkohet të prokurohet.

7. Në procedurën “shtet me shtet” autoriteti kontraktor ndjek këta hapa:

a) Pas hartimit të kërkesës operationale nga struktura gjeneruese dhe të klasifikimit të saj nga komisioni i veçantë i klasifikimit, struktura përgjegjëse pranë autoritetit kontraktor, nëpërmjet grupit të punës për hartimin e projektit, harton projektin teknik me të gjithë informacionin e mundshëm, duke përcaktuar kërkesa sa më të plota e të sakta tekniko-operationale;

b) Projekti teknik dhe rekomandimi për llojin e procedurës “shtet me shtet” i dërgohen titullarit të autoritetit kontraktor për miratim;

c) Me miratimin nga titullari, struktura përgjegjëse pranë autoritetit kontraktor i drejtohet vendit ose agjencisë së saj dhe negocion me të kushtet e projektit, ku përcaktohen edhe afatet e dërgimit nga kjo e fundit të ofertës teknike dhe ekonomike;

ç) Autoriteti kontraktor e vlerëson këtë ofertë dhe vendos nëse do të vijojë apo jo me nënshkrimin e saj.”

14. Pas nenit 21 shtohen nenet 21/1 dhe neni 21/2, me këtë përmbajtje:

“Neni 21/1

Rastet e mundshme të autorizimit të shoqërive aksionare me kapital shtetëror për furnizimin e Forcave të Armatosura me armë, municione, pajisje dhe teknologji ushtarake

1. Ministria e Mbrojtjes rakordon me shoqërinë aksionare me kapital shtetëror mbi mundësinë e plotësimit të nevojave të Forcave të Armatosurave, sipas kërkesave operationale brenda fushës së veprimtarisë së saj, apo mbi bazën e një informacioni të vënë në dispozicion nga kjo shoqëri.

2. Në rastet kur shoqëria me kapital shtetëror disponon të paktën 50% të kapaciteteve të vlerësuara si të nevojshme për realizimin e objektit të kontratës në fjalë ose zotëron shumicën e kapitalit të nënshkruar të subjektit, që është krijuar për këtë qëllim, Ministria e Mbrojtjes mund të blejë drejtpërdrejt nga shoqëria në fjalë produktet e prodhuara nga ajo apo nëpërmjet saj, sipas një projekti të hartuar nga struktura përgjegjëse për modernizimin, mbi bazën e kërkesës operationale dhe vendimit të KVK-së.

3. Në rastet kur shoqëria me kapital shtetëror disponon më pak se 50% të kapaciteteve të vlerësuara si të nevojshme për realizimin e objektit të kontratës në fjalë ose nuk zotëron shumicën e kapitalit të nënshkruar të subjektit, që është krijuar për këtë qëllim, Ministria e Mbrojtjes mund të autorizojë drejtpërdrejt këtë të fundit për nisjen e procedurave për realizimin e objektit të kontratës, me produktet e prodhuara nga ajo apo nëpërmjet saj, vetëm pasi Komiteti i Mbrojtjes dhe Sigurisë ka aprovuar për rastin në fjalë detyrimin për furnizimin e Forcave të Armatosurave nëpërmjet shoqërisë aksionare me kapital shtetëror.

4. Edhe për rastet kur objekti i kontratës do të sigurohet nëpërmjet shoqërisë aksionare me kapital shtetëror apo të subjektit, që është krijuar për këtë qëllim, projekti teknik hartohet nga struktura përgjegjëse për modernizimin, sipas kërkesës operationale dhe vendimit të KVK-së, miratohet nga titullari i autoritetit kontraktor në Ministrinë e Mbrojtjes dhe, mbi bazën e këtij projekti, kryhen negociatat me shoqërinë në fjalë, nëse është rasti.

5. Mënyra e pagesës, përfshirë parapagimin (total apo pjesor), nëse është rasti, apo vënia e fondeve në dispozicion të furnizuesit nga ana e Ministrisë së Mbrojtjes janë pjesë e negociatave dhe pasqyrohet në kontratë.

Neni 21/2 **Dialogu negociues**

1. Nëse nuk ka një autorizim të drejtpërdrejtë sipas nenit 21/1, Ministria e Mbrojtjes kryen dialog negociues me shoqërinë aksionare shtetërore për të gjitha llojet e veprimtarisë që kjo shoqëri mund të realizojë sipas legjislacionit të fushës përkatëse, për të cilat kjo shoqëri disponon apo mund të sigurojë kapacitetet e nevojshme, në kohën kur kërkohet realizimi i kontratës përkatëse.

2. Struktura përgjegjëse për modernizimin i drejtohet shoqërisë aksionare shtetërore për çmim dhe disponueshmëri për objektin konkret, duke i përcaktuar afatin brenda së cilës kjo e fundit duhet të shprehet mbi kërkesën në fjalë.

3. Për raste të argumentuara, pas marrjes së çmimit dhe disponueshmërisë nga shoqëria në fjalë, struktura përgjegjëse për modernizimin mund të kryejë analizë krahasuese, nëse disponon apo mund të sigurojë në kohë informacion mbi mundësinë e realizimit të kontratave nga subjekte të tjera, që operojnë në fushën përkatëse, duke u dërguar edhe këtyre të fundit kërkesë për çmim dhe disponueshmëri.

Nëse në përfundim të analizës krahasuese rezulton si variant më i favorshëm ai me shoqërinë aksionare shtetërore, struktura përgjegjëse për modernizimin njofton subjektet e tjera mbi këtë vendimarrje dhe vazhdohet me negociimin e kontratës me shoqërinë përkatëse.

4. Në përfundim të analizës krahasuese, struktura përgjegjëse për modernizimin mund të vendosë të mos kalojë në fazën e negociimit të kontratës me shoqërinë aksionare shtetërore, por të ftojë këtë të fundit si një ndër ofertuesit e procedurës konkurruese.

5. Shoqëria aksionare shtetërore, në rastin e pjesëmarrjes si ofertues në procedurën konkurruese, nuk ka detyrimin e paraqitjes së dokumentacionit mbi kapacitetet ligjore, financiare dhe/ose teknike, pasi kjo fazë konsiderohet e tejkaluar në kohën kur është përfshirë në listën e ofertuesve të mundshëm.

Gjithashtu, në këto raste, autoriteti kontraktor mund të parashikojë kriteret vlerësimi, që kanë të bëjnë me elemente të veçanta, që mund të sjellë përzgjedhja e shoqërisë aksionare shtetërore si furnizues i Ministrisë së Mbrojtjes (punësimin e parashikuar, të ardhura të kthyer apo dhe çdo të mirë të pritshme, që vlerësohen rast pas rasti nisur nga natyra e objektit të prokurimit).

Në rastet kur shoqëria aksionare shtetërore merr pjesë në një procedurë prokurimi, në bashkëpunim me subjekte të tjera, pavarësisht formës së bashkëpunimit ndërmjet tyre, subjekti/subjektet bashkëpunuese duhet të plotësojnë çdo kërkesë apo kriter, që u kërkohet edhe ofertuesve të tjerë, në përputhje dhe në përpjesëtim me përqindjen dhe/ose natyrën e pjesëmarrjes në shërbim apo furnizim, sipas aktmarrëveshjes përkatëse.”.

15. Pas nenit 28 shtohet neni 28/1, me këtë përmbajtje:

“Neni 28/1 **Bashkimi i operatorëve ekonomikë**

1. Oferta mund të paraqitet nga një bashkim operatorësh ekonomikë, ku njëri prej tyre i përfaqëson të tjerët gjatë procedurës dhe, në rast përzgjedhjeje, edhe gjatë zbatimit të kontratës. Në dhënien e çmimit dhe të disponueshmërisë, operatori ekonomik, të cilit i është drejtuar autoriteti kontraktor, duhet të informojë për qëllimin për të marrë pjesë si bashkim operatorësh në procedurën në fjalë.

Në dhënien e çmimit dhe të disponueshmërisë e në vijim edhe në ofertë duhet të përcaktohet pjesa e shërbimit ose e furnizimit, që do të kryejë secili nga anëtarët e këtij bashkimi.

2. Secili prej anëtarëve të këtij bashkimi duhet të përmbushë kërkesat ligjore të parashikuara të këtij vendimi dhe ato të përcaktuara në dokumentet e tenderit. Kërkesat ekonomike, financiare, profesionale dhe ato teknike duhet të përmbushen nga i gjithë bashkimi, në përputhje me përqindjen e pjesëmarrjes në shërbim apo furnizim, të përcaktuara në aktmarrëveshje.

3. Operatori ekonomik, pjesëtar i një bashkimi, nuk mund të paraqesë njëkohësisht edhe oferta individuale. Bashkimi i operatorëve ekonomikë nuk ndryshon pas dorëzimit të ofertës, në të kundërt oferta e tij refuzohet.

4. Në rast falimentimi të përfaqësuesit të bashkimit të operatorëve ekonomikë ose në rrethana të tjera, që ndërpresin veprimtarinë e tij gjatë zbatimit të kontratës, autoriteti kontraktor mund të vazhdojë kontratën me një operator tjetër ekonomik, anëtar të bashkimit, me kusht që ai të zotërojë kapacitetet ligjore, ekonomike, financiare dhe teknike për të zbatuar kontratën. Përndryshe, autoriteti kontraktor zgjidh kontratën. Në rast se këto rrethana i ndodhin operatorit tjetër ekonomik, atëherë detyrimet e operatorit të dështuar ekonomik mund të merren përsipër nga përfaqësuesi ose nga një anëtar tjetër i bashkimit, me kusht që ky të plotësojë kërkesat.”.

16. Në nenin 31 bëhen këto ndryshime dhe shtesa:

a) Në pikën 2, fjalët “... brenda 5 ditëve punë nga data ...” zëvendësohen me “... brenda 10 (dhjetë) ditëve kalendarike nga dita e nesërme e punës ...”;

b) Pas pikës 5 shtohet pika 5.1, me këtë përmbajtje:

“5.1. Anëtarët e komisionit/zyrtari i ngarkuar nuk duhet të kenë marrë pjesë në marrjen e vendimit, për të cilin është paraqitur ankesa.”.

17. Pika 2, e nenit 33, ndryshohet, si më poshtë vijon:

“2. Zbatimi dhe mbikëqyrja e kontratës realizohet nga struktura përgjegjëse për modernizimin, e cila mund të përfshijë në grupin e punës të ngritur për këtë qëllim edhe përfaqësues të strukturës, që ka përgatitur kërkesën operacionale. Ky grup vlerëson realizimin e detyrimeve kontraktore, sipas fazave të realizimit të kontratës dhe përgatit raportin përkatës për fazën, në të cilën është zbatimi i kontratës.”.

18. Neni 34, ndryshohet si më poshtë vijon:

“Neni 34

Organizimi dhe funksionimi i KVK-së

Komisioni i veçantë i klasifikimit (në vijim “KVK”) organizohet dhe funksionon si një strukturë e posaçme në Ministrinë e Mbrojtjes, me qëllim klasifikimin ose jo të kërkesave operacionale, të hartuara nga strukturat gjeneruese, si kërkesa për kontrata për blerjen e pajisjeve/mjeteve të projektuara posaçërisht ose të përshtatura për qëllime ushtarake, si dhe armët, municionet apo materialet luftarake për qëllime operacionale, përfshirë shërbimet, teknologjinë dhe *software*-t e lidhura me këto mallra.”.

19. Pas pikës 2, të nenit 36, shtohet pika 3, me këtë përmbajtje:

“3. Anëtarët e KVK-së asistohen në veprimtarinë e tyre në kuadër të këtij komisioni nga specialistë sipas fushave përkatëse.”.

20. Në nenin 37 bëhen këto shtesa dhe ndryshime:

a) Në fund të pikës 6 shtohen fjalët “... ose personi i autorizuar prej tij.”.

b) Në pikën 12 bëhen këto ndryshime dhe shtesa:

i. Fjala “... “kontrata ...” zëvendësohet me fjalët “... “kërkesa operacionale ...”;

ii. Pas fjalës “... përfshirë ...” shtohet “... shërbimet, ...”.

II. Ngarkohet Ministria e Mbrojtjes për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR

Belinda Balluku